

四庫全書

史部

欽定四庫全書

史部  
通志卷九十八下

詳校官編修<sub>臣</sub>李潢

編修<sub>臣</sub>裴謙履勘

覆校官助教<sub>臣</sub>金學詩

校對官助教<sub>臣</sub>汪錫魁

謄錄監生<sub>臣</sub>鄭嶠

欽定四庫全書

通志卷九十八下

宋右廸功郎鄭樵漁仲撰

列傳第十一

司馬相如字長卿蜀郡成都人也少時好讀書學擊劒其親名之曰犬子相如既學慕蘭相如之為人更名相如以貲為郎事孝景帝為武騎常侍非其好也會景帝不好辭賦是時梁孝王來朝從游說之士齊人鄒陽淮

陰枚乘吳嚴忌夫子之徒相如見而說之因病免客游  
梁得與諸侯游士居數歲乃著子虛之賦會孝王薨相  
如歸而家貧無以自業素與臨邛令王吉相善吉曰長  
卿久宦游不遂而困來過我於是相如往舍都亭臨邛  
令繆為恭敬日往朝相如相如初尚見之後稱病使從  
者謝吉吉愈益謹肅臨邛多富人而卓王孫家僮八百  
人程鄭亦數百人二人乃相謂曰令有貴客為具召之  
并召令既至卓氏客以百數至日中請司馬長卿長

卿謝病不能臨臨卽令不敢嘗食身自往迎相如相如  
為不得已而彊往一座盡傾酒酣臨卽令前奏琴曰竊  
聞長卿好之願以自娛相如辭謝為鼓一再行是時卓  
王孫有女文君新寡好音故相如繆與令相重而以琴  
心挑之相如時從車騎雍容閑雅甚都及飲卓氏弄琴  
文君竊從戶窺心說而好之恐不得當也既罷相如乃  
令侍人重賜文君侍者通殷勤文君夜亡奔相如相如  
與馳歸成都家徒四壁立卓王孫大怒曰女不材我不

忍殺一錢不分也或謂王孫王孫終不聽文君久之不  
樂謂長卿曰第俱如臨邛從昆弟假貸猶足以為生何  
至自苦如此相如與俱之臨邛盡賣車騎置酒舍乃令  
文君當鑪相如身自著犢鼻褌與庸保雜作滌器於市  
中卓王孫耻之為杜門不出昆弟諸公更謂王孫曰有  
一男兩女所不足者非財也今文君既失身於司馬長  
卿長卿故倦游雖貧其人材足依也且又令客奈何相  
辱如此王孫不得已分與文君僮百人錢百萬及其嫁

時衣被財物文君乃與相如歸成都買田宅為富人居

久之蜀人楊得意為狗監

主天子田獵犬

侍上上讀子虛賦而

善之曰朕獨不得與此人同時哉得意曰臣邑人司馬相如自言為此賦上驚乃召問相如相如曰有是然此乃諸侯之事未足觀請為天子游獵之賦上令尚書給筆札相如以子虛虛言也為楚稱烏有先生者烏有此事也為齊難亡是公者亡是人也欲明天子之義故空藉此三人為辭以推天子諸侯之苑囿其卒章歸之於

節儉因以風諫奏之天子大說其辭曰楚使子虛使於齊齊王悉發車騎與使者出田田罷子虛過姁烏有先生亡是公存焉坐定烏有先生問曰今日田樂乎子虛曰樂獲多乎曰少然則何樂對曰僕樂王之欲夸僕以車騎之衆而僕對以雲夢之事也曰可得聞乎子虛曰可王駕車千乘選徒萬騎田于海濱列卒滿澤罟罔彌山掩兔罝鹿射麋格麟驚於鹽浦割鮮染輪射中獲多矜而自功顧謂僕曰楚亦有平原廣澤遊獵之地饒樂



若此者乎楚王之獵孰與寡人僕下車對曰臣楚國之  
鄙人也幸得宿衛十有餘年時從出遊遊於後園覽於  
有無然猶未能徧睹也又烏足以言外澤乎齊王曰雖  
然畧以子之所聞見言之僕對曰唯唯臣聞楚有七澤  
嘗見其一未睹其餘也臣之所見蓋特其小小者耳名  
曰雲夢雲夢者方九百里其中有山焉其山則盤紆弗  
鬱隆崇律萃岑崱參差日月蔽虧交錯糾紛上干青雲  
罷池陂陀下屬江河其土則丹青赭堊雌黃白垠錫碧

金銀衆色炫燿照爛龍鱗其石則赤玉玫瑰琳珉昆吾  
城功元厲礪石武夫其東則有蕙圃衡蘭芷若穹窮昌  
蒲江離蘼蕪諸柘已且其南則有平原廣澤登降阨靡  
案衍壇曼緣以大江限以巫山其高燥則生歲析苞荔  
薜莎青蘋其埤溼則生藏菰蒹葭東牆雕胡蓮藕觚盧  
奄閭軒于衆物居之不可勝圖其西則有涌泉清池激  
水推移外發夫容陵華內隱鉅石白沙其中則有神龜  
蛟鼉毒冒鼈龜其北則有陰林巨樹梗枿豫章桂椒木

蘭檠離朱揚檀梨棗橘柚芳芬其上則有宛雛孔鸞  
騰遠射干其下則有白虎元豹蜿蜒羆紆於是乎乃使  
剗諸之倫手格此獸楚王乃駕馴駁之駟乘雕玉之輿  
靡魚須之橈旃曳明月之珠旗建干將之雄戟左烏號  
之雕弓右夏服之勁箭陽子驂乘熾阿為御案節未舒  
即陵狡獸蹙蛩蛩躡虛軼野馬轉駒駘乘遺風射游  
騏儻伸倩洌雷動焱至星流電擊弓不虛發中必決皆  
洞胃達掖絕乎心繫獲若雨獸擒草蔽地於是楚王乃

弭節徘徊翱翔容與覽乎陰林觀壯士之暴怒與猛獸  
之恐懼徼覩受詘殫覩衆物之變態於是鄭女曼姬被  
阿錫揚紵縞雜織羅垂霧縠襍積褰縐紆徐委曲鬱橈  
谿谷粉粉袞袞揚袖戍削蜚襪垂髻扶輿猗靡翕呶萃  
蔡下摩蘭蕙上拂羽蓋錯翡翠之歲蕤繆繞玉綏眇眇  
忽忽若神之髣髴於是乃羣相與獠於蕙圃嫋嫋勃窣  
上於金隄揜翡翠射蛟蟻微矰出蟻繳施弋白鵠連駕  
鵠雙鵠下元鶴加急而後游於清池浮文鷗揚旌柁張

翠帷建羽蓋罔毒冒鈞紱貝提金鼓吹鳴籟榜人歌聲  
流喝水蟲駭波鴻沸涌泉起奔揚會礪石相擊琅琅磕  
磕若雷霆之聲聞乎數百里外將息獠者擊靈鼓起烽  
燧車案行騎就隊纚乎淫淫般乎裔裔於是楚王乃登  
陽雲之臺泊乎無為澹乎自持勺藥之和具而後御之  
不若大王終日馳騁曾不下輿將割輪焯自以為娛臣  
竊觀之齊殆不如於是王無以應僕也烏有先生曰是  
何言之過也足下不遠十里來况齊國王悉境內之士

備車騎之衆與使者出田乃欲戮力致獲以娛左右也  
何名為夸哉問楚地之有無者願聞大國之風烈先生  
之餘論也今足下不稱楚王之德厚而盛推雲夢以為  
驕奢言淫樂而顯侈靡竊為足下不取也必若所言固  
非楚國之美也有而言之是章君之惡也無而言之是  
害足下之信也章君惡傷私義二者無一而可先生行  
之必且輕於齊而累於楚矣且齊東階鉅海南有琅邪  
觀乎成山射乎之罘浮勃澥游孟諸邪與肅慎為鄰右

以湯谷為界秋田于青邱彷徨乎海外吞若雲夢者八九其於甸中曾不帶芥若乃倣儻瑰瑋異方殊類珍怪鳥獸萬端鱗倅充牣其中者不可勝紀禹不能名尚不能計然在諸侯之位不敢言遊戲之樂苑囿之大先生又見客是以王辭不復何為無以應哉亡是公听然而笑曰楚則失矣而齊亦未為得也夫使諸侯納貢者非為財帛所以述職也封疆畫界者非為守禦所以禁淫也今齊列為東藩而外私肅慎捐國隄限越海而田其

於義固未可也且二君之論不務明君臣之義正諸侯之禮徒事爭於游戲之樂苑囿之大欲以奢侈相勝荒淫相越此不可以揚名發譽而適足以卑君自損也且夫齊楚之事又烏足道乎君未覩夫巨麗也獨不聞天子之上林乎左蒼梧右西極丹水更其南紫淵徑其北終始霸產出入涇渭豐鎬潦滴紆餘委蛇經營其內蕩蕩乎八川分流相背異態東西南北馳騫往來出乎椒邱之闕行乎州淤之浦徑乎桂林之中過乎泂莽之壁



汨乎混流順阿而下赴隘陘之口觸穹石激堆埼沸乎  
暴怒洶涌彭湃澤弗宓汨偪側泌瀾橫流逆折轉騰激  
洌滂潏沆漑穹隆雲橈宛潭膠盭踰波趨汜汜下瀨  
批巖衝擁奔揚滯沛臨坻注壑灑潏實隊沈沈隱隱砰  
磅訇磕潏潏湑湑潄潄湑潄湑潄湑潄湑潄潄湑潄湑潄  
長懷寂寥無聲肆乎永歸然後灝漾潢漾安翔徐徊翺  
乎瀉瀉東注大湖衍溢陂池於是蛟龍赤螭鰕鱗漸離  
魴鰔鰕魴禺禺魴魴捷鰭掉尾振鱗奮翼潛處乎深巖

魚鼈譟聲萬物衆夥明月珠子的皪江靡蜀石黃磳水  
玉磊砢磷磷爛爛采色澔汗叢積乎其中鳴鵲鵲鴛鴦  
鷺屬玉交精旋目煩鶩庸渠箴疵鵠盧羣浮乎其上的汎  
淫汜濫隨風澹淡與波搖蕩奄薄水渚唼唼菁藻咀嚼  
菱藕於是乎崇山矗矗龍從崔巍深林巨木蘄巖參差  
九嶷巖薛南山峩峩巖池甌錡稚萎岵崎振谿通谷蹇  
產溝瀆谿呀谿間阜陵別鳴歲魄喪廐丘墟堀礪隱輶  
鬱壘登降施靡陂池鯉豸允溶淫嚮散渙夷陸亭臯千

里靡不被築揜以綠蕙被以江離糅以蘼蕪雜以留夷  
布結縷攢戾莎揭車衡蘭橐本射干茝薑蕞荷歲持若  
蓀鮮支黃礫蔣茅青蘋布濩閎澤延曼太原離靡廣衍  
應風披靡吐芳揚烈郁郁菲菲衆香發越盼蠻布寫晻  
菱呖萋於是乎周覽汜觀續紛軋芴芒芒恍忽視之無  
端察之無涯日出東沼入庠西陂其南則隆冬生長涌  
水躍波其獸則庸旄貘羆沈牛麀麋赤首圓題窮奇象  
犀其北則盛夏含凍裂地涉水揭河其獸則麒麟角端

駒駝橐駝蛩蛩驂駃騠驢驘於是乎離宮別館彌山  
跨谷高廓四注重坐曲閣華棖壁璫輦道纚屬步櫚周  
流長途中宿夷巖築堂系臺增成巖突洞房頰杳眇而  
無見仰艸櫟而捫天奔星更於閨闈宛虹拖於楯軒青  
龍蚺蜺於東箱象輿婉憚於西清靈囿燕於閒館偃佺  
之倫暴於南榮醴泉涌於清室通川過於中庭磐石根  
崖欽巖倚傾嵯峨嵒嵒刻削崢嶸玫瑰碧琳珊瑚叢生  
珉玉旁唐玢幽文磷赤瑕駸犖雜甬其間鼉采琬琰和

氏出焉於是乎盧橘夏熟黃甘橙棗枇杷樛柿亭奈厚  
朴棗棗楊梅櫻桃蒲萄隱夫萸棣答遯離支羅乎後宮  
列乎北園馳邱陵下平原揚翠葉抗紫莖發紅華垂朱  
榮煌煌扈扈照耀鉅野沙棠櫟楮華風枰櫨留落胥邪  
仁頻并閭欒檀木蘭豫章女貞長千仞大連抱夸條直  
暢實葉後楸攢立叢倚連卷欒倂崔錯發翫坑衡間珂  
垂條扶踈落英幡纒紛溶蓊蔘倚柅從風薊葭歛蓋  
象金石之聲管籥之音柴池莛虎旋還乎後宮雜襲累

輯被山緣谷循阪下隰視之無端究之亡窮於是乎元  
援素雌蜺攫飛蠋蛭蜩攫螭獬胡穀蛻棲息乎其間長  
嘯哀鳴翩幡互經夭矯枝格偃蹇杪顛隕絕梁騰殊榛  
捷垂條掉希間牢落陸離爛漫遠邈若此者數百千處  
娛游往來宮宿館舍庖厨不徙後宮不移百官備具於  
是乎背秋涉冬天子校獵乘鏤象六玉蚪拖蜺旌靡雲  
旗前皮軒後道游孫叔奉轡衛公參乘扈從橫行出乎  
四校之中鼓嚴簿縱獵者江河為陸泰山為櫓車騎雷

起殷天動地先後陸離離散別追淫淫裔裔緣陵流澤  
雲布雨施生貔豹搏豺狼手熊羆足罽羊蒙鶡蘇綉白  
虎被斑文跨罽馬陵三峻之危下磧歷之坻徑峻赴險  
越壑厲水推蜚廉弄解廬格蝦蛤鉞猛氏縞驤裹射封  
豕箭不苟害解脰陷腦弓不虛發應聲而倒於是乘輿  
弭節徘徊翱翔往來睨部曲之進退覽將帥之變態然  
後侵淫促節儵負遠去流離輕禽蹙履狡獸轉白鹿捷  
狡兔軼赤電遺光耀追怪物出宇宙彎蕃弱滿白羽射

游臬櫟蜚遽擇肉而後發先中而命處弦矢分執殪仆  
然後揚節而上浮陵驚風歷駭焱來虛亡與神俱蘭元  
鶴亂昆雞邁孔鸞促駿驥拂翳鳥捎鳳凰捷鵠雛拚焦  
明道盡塗彈迴車而還消搖乎襄羊降集乎北紘率乎  
直指拚乎反鄉歷石關歷封巒過雄鵠望露寒下棠梨  
息宜春西馳宣曲濯鷁牛首登龍臺掩細柳觀士大夫  
之勤畧鈞獵者之所獲徒車之所閤轢騎之所蹂若人  
之所蹈藉與其窮極倦飢驚憚驚伏不被創刃而死者



它它藉藉填阬滿谷掩平彌澤於是乎遊戲懈怠置酒  
乎顥天之臺張樂乎膠葛之寓撞千石之鐘立萬石之  
虞建翠華之旗樹靈鼉之鼓奏陶唐氏之舞聽葛天氏  
之歌千人倡萬人和山陵為之震動川谷為之蕩波巴  
俞宋蔡淮南千遮文成顥歌族居遞奏金鼓迭起鏗鏘  
闐鞀洞心駭耳荆吳鄭衛之聲韶濩武象之樂陰淫案  
衍之音鄙郢繽紛激楚結風俳優侏儒狄鞮之倡所以  
娛耳目而樂心意者麗靡爛漫於前靡曼美色於後若

夫青琴處妃之徒絕殊離俗妖冶閑都靚莊刻飾便嬛  
韓約柔橈嫋嫋嫵媚纖弱曳獨繭之榆袪眇閭易以恤  
削便嫵嫵眉與世殊服芬芳漚鬱酷烈淑郁皓齒粲爛  
宜笑的樂長眉連娟微睇絲藐色授魂與心愉於側於  
是酒中樂酣天子芒然而思似若有亡曰嗟乎此泰奢  
侈朕以覽聽餘間無事棄日順天道以殺伐時休息於  
此恐後世靡麗遂往而不返非所以為繼嗣創業垂統  
也於是乎乃解酒罷獵而命有司曰地可以墾辟悉為

農郊以贍氓隸墮墻填塹使山澤之民得至焉實陂池而勿禁虛宮館而勿仞發倉廩以救貧窮補不足恤鰥寡存孤獨出德號省刑罰改制度易服色革正朔與天下為始於是歷吉日以齊戒襲朝服乘法駕建華旗鳴玉鸞遊乎六藝之圃驚乎仁義之塗覽觀春秋之林射狸首無騶虞弋元鶴舞干戚載雲罕拚羣雅悲伐檀樂樂胥修容乎禮園翱翔乎書圃述易道放怪獸登明堂坐清廟恣羣臣奏得失四海之內無不受獲於斯之時

天下大說鄉風而聽隨流而化粹然興道而遷義刑錯而不用德隆於三皇功美於五帝若此故獵乃可喜也若夫終日馳騁勞神苦形罷車馬之用杭士卒之精費府庫之財而無德厚之恩務在獨樂不顧衆庶忘國家之政貪雉兔之獲則仁者不繇也從此觀之齊楚之事豈不哀哉地方不過千里而囿居九百是草木不得墾辟而民無所食也夫以諸侯之細而樂萬乘之所侈僕恐百姓被其尤也於是二子愀然改容超若自失逡巡

避席曰鄙人固陋不知忌諱乃今日見教謹受命矣賦  
奏天子以為郎亡是公言上林廣大山谷水泉萬物及  
子虛言雲夢所有甚衆侈靡多過其實且非義理所止  
故刪取其要歸正道而論之相如為郎數歲會唐蒙使  
畧通夜郎魋中發巴蜀卒吏千人郡又多為發轉漕萬  
餘人用軍興法誅其渠率巴蜀民大驚恐上聞之乃遣  
相如責唐蒙等因諭告巴蜀民以非上意檄曰告巴蜀  
太守蠻夷自擅不討之日久矣時侵犯邊境勞士大夫

卷九十八  
陛下即位存撫天下集安中國然後興師出兵北征匈奴單于怖駭交臂受事屈膝請和康居西域重譯納貢稽首來享移師東指闐越相誅右弔番禺太子入朝南夷之君西徼之長常效貢職不敢惰怠延頸舉踵喁喁然皆鄉風慕義欲為臣妾道里遼遠山川阻深不能自致夫不順者已誅而為善未賞故遣中郎將往賞之發巴蜀之士各五百人以奉幣衛使者不然靡有兵革之事戰鬪之患今聞其乃發軍興制驚懼子弟憂患長老

郡又擅為轉粟運輸皆非陛下之意也當行者或亡逃  
自賊殺亦非人臣之節也夫邊郡之士聞烽舉燧燔皆  
攝弓而馳荷兵而走流汗相屬惟恐居後觸白刃冒流  
矢議不反顧計不旋踵人懷怒心如報私讎彼豈樂死  
惡生非編列之民而與巴蜀異主哉計深慮遠急國家  
之難而樂盡人臣之道也故有剖符之封析圭而爵位  
為通侯居列東第終則遺顯號於世傳土地於子孫事  
行甚忠敬居位甚安佚名聲施於無窮功烈著而不滅

是以賢人君子肝腦塗中原膏液潤堊中而不辭也今奉幣使至南夷即自賊殺或亡逃抵誅身死無名諡為至愚耻及父母為天下笑人之度量相越豈不遠哉然此非獨行者之罪也父兄之教不先子弟之率不謹寡廉鮮耻而俗不長厚也其被刑戮不亦宜乎陛下患使者所司之若彼悼不肖愚民之如此故遣信使曉諭百姓以發卒之事因數之以不忠死亡之罪讓三老孝弟以不教誨之過方今田時重煩百姓已親見近縣恐遠



所谿谷山澤之民不徧聞檄到亟下縣道咸諭陛下意  
毋忽相如還報唐蒙已畧通夜郎因通西南夷道發巴  
蜀廣漢卒作者數萬人治道二歲道不成士卒多物故  
費以億萬計蜀民及漢用事者多言其不便是時邛笮  
之君長聞南夷與漢通得賞賜多多欲願為內臣妾請  
吏比南夷上問相如相如曰邛笮冉駹者近蜀道易通  
異時嘗通為郡縣矣至漢興而罷今誠復通為置縣愈  
於南夷上以為然乃拜相如為中郎將建節往使副使

者王然于壺充國呂越人馳四乘之傳因巴蜀吏幣物  
以賂西南夷至蜀太守以下郊迎縣令負弩矢先驅蜀  
人以為寵於是卓王孫臨邛諸公皆因門下獻牛酒以  
交驩卓王孫喟然而歎自以得使女尚司馬長卿晚乃  
厚分與其女財與男等相如使畧定西南夷邛笮冉駹  
斯榆之君皆請為臣妾除邊關邊關益斥西至沫若水  
南至牂柯為徼通靈山道橋孫水以通邛笮還報天子  
大說相如使時蜀長老多言通西南夷之不為用大臣

亦以為然相如欲諫業已建之不敢乃著書藉蜀父老  
為辭而已詰難之以風天子且因宣其使詣令百姓皆  
知天子意其辭曰漢興七十有八載德茂存乎六世威  
武紛云湛恩汪濊羣生霑濡洋溢乎方外於是乃命使  
西征隨流而攘風之所被罔不披靡因朝冉從駝定作  
存邛畧斯榆舉苞蒲結軌還轅東鄉將報至於蜀都耆  
老大夫搢紳先生之徒二十有七人儼然造焉辭畢進  
曰蓋聞天子之於夷狄也其義羈縻勿絕而已今罷二

郡之士通夜郎之塗三年於茲而功不竟士卒勞倦萬民不贍今又接之以西夷百姓力屈恐不能卒業此亦使者之累也竊為左右患之且夫邛笮西僰之與中國並也歷年茲多不可記已仁者不以德來彊者不以力并意者殆不可乎今割齊民以附夷狄弊所恃以事無用鄙人固陋不識所謂使者曰烏謂此乎必若所云則是蜀不變服而巴不化俗也僕尚惡聞若說然斯事體大固非觀者之所覲也余之行急其詳不可得聞已請

為大夫粗陳其畧蓋世必有非常之人然後有非常之事有非常之事然後有非常之功非常者固常人之所異也故曰非常之元黎民懼焉及臻厥成天下晏如也昔者洪水沸出汜濫衍溢民人升降移徙崎嶇而不安夏后氏戚之乃堙洪源決江疏河灑沈澹災東歸之於海而天下永寧當斯之勤豈惟民哉心煩於慮而身親其勞躬餓胼胝無腠膚不生毛故休烈顯乎無窮聲稱浹乎于茲且夫賢君之踐位也豈特委瑣握璫拘文牽

俗循誦習傳當世取說云爾哉必將崇論宏議創業垂  
統為萬世規故馳驚乎兼容并包而勤思乎參天貳地  
且詩不云乎普天之下莫非王土率土之濱莫非王臣  
是以六合之內八方之外浸淫衍溢懷生之物有不浸  
潤於澤者賢君耻之今封疆之內冠帶之倫咸獲嘉祉  
靡有闕遺矣而夷狄殊俗之國遼絕異黨之域舟車不  
通人迹罕至政教未加流風猶微內之則犯義侵禮於  
邊境外之則邪行橫作放殺其上君臣易位尊卑失序

父兄不辜幼孤為奴虜係繫號泣內鄉而怨曰蓋聞中國有至仁焉德洋恩普物靡不得其所今獨曷為遺已舉踵思慕若枯旱之望雨豔夫為之垂涕况乎上聖又烏能已故北出師以討彊胡南馳使以誚勁越四面風德二方之君鱗集仰流願得受號者以億計故乃關沫若徼牂柯鑲靈山梁孫原創道德之塗垂仁義之統將博恩廣施遠撫長駕使疏逖不閉習爽暗昧得耀乎光明以偃甲兵於此而息討伐於彼遐邇一體中外禔福

不亦康乎夫拯民於沈溺奉至尊之休德反哀世之陵夷繼周氏之絕業乃天子之急務也百姓雖勞又惡可以已哉且夫王者固未有不始於憂勤而終於逸樂者也然則受命之符合在於此方將增泰山之封加梁父之事鳴和鸞揚樂頌上咸五下登三觀者未覩指聽者未聞音猶焦朋已翔乎寥廓而羅者猶視乎藪澤悲夫於是諸大夫茫然喪其所懷來失厥所以進喟然並稱曰允哉漢德此鄙人之所願聞也百姓雖勞請以身先



之敬罔靡徙遷延而辭避其後人有上書言相如使時  
受金失官居歲餘復召為郎相如口吃而善著書常有  
消渴疾與卓氏婚饒於財故其仕宦未嘗肯與公卿國  
家之事常稱疾閒居不慕官爵嘗從上至長楊獵時天  
子方好自擊熊豕馳逐塹獸相如因上疏諫其辭曰臣  
聞物有同類而殊能者故力稱烏獲捷言慶忌勇期賁  
育臣之愚竊以為人誠有之獸亦宜然今陛下好陵阻  
險射猛獸卒然遇逸材之獸駭不存之地犯屬車之清

塵輿不及還轅人不暇施巧雖有烏獲逢蒙之技不得用枯木朽株盡為難矣是胡越起於轂下而羗夷接軫也豈不殆哉雖萬金而無患然本非天子之所宜近也且夫清道而後行中路而馳猶時有銜檠之變況乎涉豐草騁邱虛前則有利獸之樂而內無存變之憂其為害也不亦難矣夫輕萬乘之重不以為安樂出萬有一危之塗以為娛臣竊為陛下不取蓋明者遠見於未萌而智者避危於無形既固多藏於隱微而發於人之所

忽者也故鄙諺曰家系十金坐不垂堂此言雖小可以  
諭大臣願陛下留意幸察上善之還過宜春宮相如奏  
賦以哀二世行失其辭曰登陂陲之長阪兮坐入曾宮  
之嵯峨臨曲江之隍州兮望南山之參差巖巖深山之  
硤硤兮通谷礫乎矜研汨滅鞞以永逝兮注平臯之廣  
衍觀衆樹之蓊薈兮覽竹林之榛榛東馳土山兮北揭  
石瀨弭節容與兮歷弔二世持身不謹兮亡國失勢信  
讒不寤兮宗廟滅絕烏乎操行之不得墓蕪穢而不修

兮魂無歸而不食相如拜為孝文園令上既美子虛之事相如見上好神僊因曰上林之事未足美也尚有靡者臣嘗為大人賦未就請具而奏之相如以為列僊之儒居山澤間形容甚癯此非帝王之僊意也乃遂奏大人賦其辭曰世有大人兮在乎中州宅彌萬里兮曾不足少留悲世俗之逼隘兮竭輕舉而遠遊乘絳幡之紫蜺兮載雲氣而上浮建格澤之修竿兮總光耀之采旄垂旬始以為幃兮曳彗星而為髻掉指橋以偃蹇兮

又猗昵以招搖，搯攬搶以爲旌。兮靡屈虹而爲綢，紅杏  
眇以元湑。兮焱風涌而雲浮，駕應龍象輿之蹇畧。委麗  
兮驂赤螭青蛇之蚺蜺，宛蜒低卬夭踞裾以驕驚兮。詘  
折隆窮，躍以連卷。沛艾赴螭，佗以佻儼兮。放散畔岸，驤  
以屏顏。跽蹠輟螭，以飢麗兮。蜩蜚偃蹇，怵奠以梁倚糾。  
蓼叫皋，踏以腴路兮。葳蕤踊躍騰而狂，趨蒞颯歛焱  
至電過兮。煥然霧除，霍然雲消邪。絕少陽而登太陰兮，  
與真人乎相求。互折窈窕以右轉兮，橫厲飛泉以正東。

悉徵靈圉而選之兮部署衆神於搖光使五帝先導兮  
反大壺而從陵陽左元冥而右黔雷兮前長離而後裔  
皇廡征伯僑而役羨門兮詔岐伯使尚方祝融警而蹕  
御兮清氣氛而後行屯余車而萬乘兮綽雲蓋而樹華  
旗使勾芒其將行兮吾欲往乎南娛歷唐堯於崇山兮  
過虞舜於九疑紛湛湛其差錯兮雜遡膠輶以方馳騷  
擾衝從其紛拏兮滂潏決軋麗以林離攢羅列聚叢以  
龍茸兮衍曼流爛瘡以陸離徑入雷室之砰磷鬱律兮

洞出鬼谷之崛壘歲魁徧覽八紘而觀四海兮竭度九  
江越五河經營炎火而浮弱水兮杭絕浮渚涉流沙奄  
息葱極汜濫水娛兮使靈媧鼓琴而舞馮夷時若曖曖  
將混濁兮召屏翳誅風伯刑雨師西望崑崙之輒沕荒  
忽兮直徑馳乎三危排閭闔而入帝宮兮載玉女而與  
之歸登閭風而遙集兮亢鳥騰而壹止低徊陰山翔以  
紆曲兮吾乃今日覩西王母皜然白首戴勝而穴處兮  
亦幸有三足鳥為之使必長生若此而不死兮雖濟萬

世不足以喜回車竭來兮絕道不周會食幽都呼吸沆  
瀣兮餐朝霞咀嚙芝英兮噉瓊華傑祲尋而高縱兮紛  
鴻溶而上厲貫列缺之倒景兮涉豐隆之滂濞騁游道  
而修降兮驚遺霧而遠逝迫區中之隘陝兮舒節出乎  
北垠遺屯騎於元闕兮軼先驅於寒門下崢嶸而無地  
兮上嶮廓而無天視眩泯而亡見兮聽敞怳而亡聞乘  
虛亡而上遐兮超無友而獨存相如既奏大人賦天子  
大說飄飄有陵雲氣游天地之間意相如既病免家居



茂陵天子曰司馬相如病甚可往悉取其書書若後之  
矣使所忠往而相如已死家無遺書問其妻對曰長卿  
未嘗有書也時時著書人又取去長卿未死時為一卷  
書曰有使來求書奏之其遺札書言封禪事所忠奏焉  
天子異之其辭曰伊上古之初肇自顓穹生民歷選列  
辟以迄于秦率邇者踵武聽逝者風聲紛輪威蕤堙滅  
而不稱者不可勝數也繼昭夏崇號謚畧可道者七十  
有二君罔若淑而不昌疇逆失而能存軒轅之前遐哉

邈乎其詳不可得聞已五三六經載籍之傳維見可觀也書曰元首明哉股肱良哉因斯以談君莫盛於克臣莫賢於后稷后稷創業於唐公劉發迹於西戎文王改制爰周卸隆大行越成而后陵遲衰微千載亡聲豈不善始善終哉然無異端慎所由於前謹遺教於後耳故軌迹夷易易遵也湛恩龐洪易豐也憲度著明易則也垂統順理易繼也是以業隆於緼祿而崇冠乎二后揆厥所元終都攸卒未有殊尤絕迹可考於今者也然猶

躡梁甫登太山建顯號施尊名大漢之德逢涌原泉沕  
滴曼羨旁魄四塞雲布霧散上暢九垓下汭八埏懷生  
之類沾濡浸潤協氣橫流武節焱逝邇匪游原迴濶泳  
末首惡鬱沒暗昧昭晰昆蟲閭澤回首面內然後固騶  
虞之珍羣徼麋鹿之怪獸導一莖六穗於庖犧雙觥共  
抵之獸獲周餘放龜于岐招翠黃乘龍於沼鬼神接靈  
囿賓於間館奇物譎詭倣儻窮變欽哉符瑞臻茲猶以  
為薄不敢道封禪盖周躍魚隕杭休之以燎微夫斯之

為符也以登介邱不亦慝乎進攘之道何其爽與於是  
大司馬進曰陛下仁育羣生義征不諛諸夏樂貢百蠻  
執贄德侔往初功無與二休烈液洽符瑞衆變期應紹  
至不特創見意者泰山梁父設壇場望幸蓋號以况榮  
上帝垂恩儲祉將以慶成陛下謙讓而弗發也挈三神  
之歡缺王道之儀羣臣慝焉或謂且天為質闇示珍符  
固不可辭若然辭之是泰山靡記而梁甫罔幾也亦各  
並時而榮咸濟厥世而屈說者尚何稱於後而云七十

二君哉夫修德以錫福奉符以行事不為進越也故聖  
王弗替而修禮以祗謁款天神勤功中嶽以章至尊舒  
盛德發號榮受厚福以浸黎民皇皇哉斯事天下之壯  
觀王者之卒業不可貶也願陛下全之而后因雜縉紳  
先生之畧術使獲曜日月之末光絕焱以展采錯事猶  
兼正列其義祓飾厥文作春秋一藝將襲舊六為七摠  
之無窮俾萬世得激清流揚微波蜚英聲騰茂實前聖  
之所以永保鴻名而常為稱首者用此宜命掌故悉奏

其儀而覽焉於是天子沛然改容曰俞乎朕其試哉乃  
遷思回慮總公卿之議詢封禪之事詩大澤之博廣壤  
瑞之富遂作頌曰自我天覆雲之油油甘露時雨厥壤  
可游滋液滲漉何生不育嘉穀六穗我穡曷蓄匪唯雨  
之又潤澤之匪唯偏我汜布濩之萬物熙熙懷而慕之  
名山顯位望君之來君兮君兮侯不邁哉殷殷之獸樂  
我君圃白質黑章其儀可喜旼旼穆穆君子之態蓋聞  
其聲今視其來厥塗靡從天瑞之徵茲爾於舜虞氏以

興濯濯之麟游彼靈時孟冬十月君徂郊祀馳我君輿  
帝用享祉三代之前蓋未嘗有宛宛黃龍興德而升采  
色元耀煥炳輝煌正陽顯見覺寤黎烝於傳載之云受  
命所乘厥之有章不必諄諄依類託寓諭以封巒披蓺  
觀之天人之際已交上下相發允答聖王之事兢兢翼  
翼故曰於興必慮衰安必畏危是以湯武至尊嚴不失  
肅祇舜在假典顧省厥遺此之謂也相如既卒五歲上  
始祭后土八年而遂禮中岳封于太山至梁甫禪肅然

相如他所著若遺平陵侯書與五公子相難中木書篇  
不采采其尤著公卿者云

公孫弘字季齊菑川薛人也少時為薛獄吏有臯免家  
貧牧豕海上年四十餘乃學春秋雜說武帝初即位招  
賢良文學之士是時弘年六十以賢良徵為博士使匈  
奴還報不合意上怒以為不能弘乃移病免歸元光五  
年復徵賢良文學菑川國復推上弘弘謝曰前已嘗西  
應命以不能罷歸願更推選國人固推弘弘至太常上



策詔諸儒制曰蓋聞上古至治畫衣冠異章服而民不  
犯陰陽和五穀登六畜蕃甘露降風雨時嘉禾興朱草  
生山不童澤不涸麟鳳在郊數龜龍游於沼河洛出圖  
書父不喪子兄不哭弟北發渠搜南撫交趾舟車所至  
人迹所及跂行喙息咸得其宜朕甚嘉之今何道而臻  
乎此子大夫修先聖之術明君臣之義講論洽聞有聲  
乎當世敢問子大夫天人之道何所本始吉凶之效安  
所期焉禹湯水旱厥咎何由仁義禮智四者之宜當安

設施屬統垂業物鬼變化天命之符廢興何如天文地理人事之紀子大夫習焉其悉意正議詳具其對著之于篇朕將親覽焉靡有所隱弘對曰臣聞上古堯舜之時不貴爵賞而民勸善不重刑罰而民不犯躬率以正而遇民信也末世貴爵厚賞而民不勸深刑重罰而姦不止其上不正遇民不信也夫厚賞重刑未足以勸善而禁非必信而已矣是故因能任官則分職治去無用之言則事情得不作無用之器則賦斂省不奪民時不

妨民力則百姓富有德者進無德者退則朝廷尊有功者上無功者下則羣臣遂罰當罪則姦邪止賞當賢則臣下勸凡此八者治民之本也故民者業之即不爭理得則不怨有禮則不暴愛之則親上此有天下之急者也故法不遠義則民服而不離和不遠禮則民親而不暴故法之所罰義之所去也和之所賞禮之所取也禮義者民之所服也而賞罰順之則民不犯禁矣故畫衣冠異章服而民不犯者此道素行也臣聞之氣同則從

聲比則應今人主和德於上百姓和合於下故心和則氣和氣和則形和形和則聲和聲和則天地之和應矣故陰陽和風雨時甘露降五穀登六畜蕃嘉禾興朱草生山不童澤不涸此和之至也故形和則無疾無疾則不夭故父不喪子兄不哭弟德配天地明並日月則麟鳳至龜龍在郊河出圖洛出書遠方之君莫不說義奉幣而來朝此和之極也臣聞之仁者愛也義者宜也禮者所履也智者術之原也致利除害兼愛無私謂之仁

明是非立可否謂之義進退有度尊卑有分謂之禮擅殺生之柄通壅塞之塗權輕重之數論得失之道使遠近情僞必見於上謂之術凡此四者治之本道之用也皆當設施不可廢也得其要則天下安樂法設而不用不得其術則主蔽於上臣亂於下此事之情屬統垂業之本也臣聞堯遭鴻水使禹治之未聞禹之有水也若湯之旱則桀之餘烈也桀紂行惡受天之罰禹湯積德以王天下因此觀之天德無私親順之和起逆之害生

此天文地理人事之紀臣弘愚戇不足以奉大對時對者百餘人太常奏弘第居下策奏天子擢弘對為第一召見容貌甚麗拜為博士待詔金馬門弘復上疏曰陛下有先聖之位而無先聖之名有先聖之民而無先聖之吏是以勢同而治異先世之吏正故其民篤今世之吏邪故其民薄政弊而不行令倦而不聽夫使邪吏行弊政用倦令治薄民民不可得而化此治之所以異也臣聞周公旦治天下暮年而變三年而化五年而定唯

陛下之所志書奏天子以冊書答曰問弘稱周公之治  
弘之材能自視孰與周公賢弘對曰愚臣淺薄安敢比  
材於周公雖然愚心曉然見治道之可以然也夫虎豹  
馬牛禽獸之不可制者也及其教馴服習之至可牽持  
駕服唯人之從臣聞揉曲木者不累日銷金石者不累  
月夫人之於利害好惡豈比禽獸木石之類哉暮年而  
變臣弘尚且遲之上異其言時方通西南夷巴蜀苦之  
詔使弘視焉還奏事盛毀西南夷無所用上不聽每朝

會議開陳其端使人主自擇不肯面折廷爭於是上察其行慎厚辯論有餘習文法吏事緣飾以儒術上說之一歲中至左內史弘奏事有不可者不肯庭辯嘗與主爵都尉汲黯請問汲黯先發之弘推其後天子常說所言皆聽以此日益親貴嘗與公卿約議至上前皆背其約以順上旨汲黯庭詰弘曰齊人多詐而無情實始為與臣等建此議今皆背之不忠上問弘弘謝曰夫知臣者以臣為忠不知臣者以臣為不忠上然弘言左右幸



臣每毀弘上益厚遇之弘為人談笑多聞常稱以為人  
主病不廣大人臣病不節儉養後母孝謹後母卒服喪  
三年為內史數年為御史大夫時又東置蒼海北築朔  
方之郡弘數諫以為罷敝中國以奉無用之地願罷之  
於是天子乃使朱買臣等難弘置朔方之便發十策弘  
不得一乃謝曰山東鄙人不知其便若是願罷西南夷  
蒼海而專奉朔方上乃許之汲黯曰弘位在三公奉祿  
甚多然為布被此詐也上問弘弘謝曰有之夫九卿與

臣善者無過黯然今日庭詰弘誠中弘之病夫以三公為布被誠飾詐欲以釣名且臣聞管仲相齊有三歸侈擬於君桓公以霸亦上僭於君晏嬰相景公食不重肉妾不衣絲齊國亦治亦下比於民今臣弘位為御史大夫而為布被自九卿已下至於小吏無差誠如黯言且無黯陛下安聞此言天子以為有讓愈益賢之元朔五年代薛澤為丞相先是漢常以列侯為丞相唯弘無爵上於是下詔以高成之平津鄉六百五十戶封弘為平

津侯其後以為故事至丞相封侯自弘始也時上方興  
功業屢舉賢良弘自見為舉首起徒步數年至宰相封  
侯於是起客館開東閣以延賢人與參謀議弘身食一  
肉脫粟飯故人賓客仰衣食奉祿皆以給之家無所餘  
然其性意急外寬內深諸嘗與弘有隙無遠近雖陽與  
善後竟報其過殺主父偃徙董仲舒膠西皆弘之力也  
後淮南衡山謀反治黨與方急弘病甚自以為無功而  
封侯居宰相位宜佐明主鎮撫國家使人由臣子之道

今諸侯有畔逆之計此皆大臣奉職不稱也恐病死無以塞責乃上書曰臣聞天下通道五所以行之三君臣父子夫婦長幼朋友之交五者天下之通道也仁智勇三者所以行之故曰好問近乎知力行近乎仁知耻近乎勇知此三者知所以自治知所以自治然後知所以治人未有不能自治而能治人者也陛下躬孝弟監三王建周道無文武招徠四方之士任賢序位量能授官將以厲百姓勸賢材也今臣愚駑無汗馬之勞陛下過

意擢臣弘卒伍之中封為列侯致位三公臣弘行能不  
足以稱加有負薪之疾恐先狗馬填溝壑終無以報德  
塞責願歸侯印乞骸骨避賢者路上報不許因賜告牛  
酒雜帛居數月有瘳視事凡為丞相御史六歲年八十  
終丞相位其後李蔡嚴青翟趙周石慶公孫賀劉屈氂  
繼踵為丞相自蔡至慶丞相府客館邱虛而已至賀屈  
氂時壞以為馬廐車庫奴婢室矣惟慶以惇謹復終相  
位其餘盡伏誅云弘子度嗣侯為山陽太守十餘歲坐

法失侯元始中修功臣後賜弘後子孫之次見為適者爵關內侯食邑三百戶

卜式河南人也以田畜為事有少弟弟壯式脫身出獨取畜羊百餘田宅財物盡與弟式入山牧十餘年年致千餘頭買田宅而弟盡破其產式輒復分與弟者數矣時漢方用事匈奴式上書願輸家財半助邊上使使問式欲為官乎式曰自小牧羊不習仕宦不願也使者曰家豈有冤欲言事乎式曰邑人貧者貸之不善者教之

所居人皆從式式何故見寃使者曰荀子何欲式曰天子誅匈奴愚以為賢者宜死節有財者宜輸之如此而匈奴可滅也使者以聞上以語丞相弘弘曰此非人情不軌之臣不可以為化而亂法願陛下勿許上不報數歲乃罷式式歸復田牧歲餘會渾邪等降縣官費衆倉府空貧民大徙皆卽給縣官無以盡贍式復持錢二十萬與河南太守以給徙民河南上富人助貧民者上識式姓名曰是固前欲輸其家財半助邊乃賜式繇四百

人式又盡復與官是時富豪皆爭匿財唯式尤欲助費上於是以式終長者乃召拜式為中郎賜爵左庶長田十頃布告天下尊顯以風百姓初式不願為郎上曰吾有羊在上林中欲令子牧之式既為郎布衣草屣而牧羊歲餘羊肥息上過其羊所善之式曰非獨牧羊也治民亦猶是矣以時起居惡者輒去無令敗羣上奇其言欲試使治民拜緱氏令緱氏便之遷成臯令將漕最上以式朴忠拜為齊王太傅轉為相會呂嘉反式上書曰



臣聞主愧臣死羣臣宜盡死節其驚下者宜出財以佐  
軍如是則彊國不犯之道也臣願與子男及臨菑習弩  
博昌習船者請行死之以盡臣節上賢之下詔優獎式  
賜爵關內侯黃金四百斤田一十頃布告天下使明知  
之元鼎中徵式代石慶為御史大夫式既在位言郡國  
不便鹽鐵而船有筭可罷上由是不說式明年當封禪  
式又不習文章貶秩為太子太傅以兒寬代之式以壽  
終

兒寬十乘人也治尚書事歐陽生以郡國選詣博士受業孔安國貧無資用常為弟子都養時行貨作帶經而鉏休息輒讀誦其精如此以射策為掌故功次補廷尉文學卒史寬為人溫良有廉知自將善屬文然懦於武口弗能發明也時張湯為廷尉廷尉府盡用文史法律之吏而寬以儒生在其間見謂不習事不署曹除為從

史

從史者但只隨官僚不主文書

之北地視畜數年

畜謂廷尉之畜在北地者若今諸司

公廨牛羊

還至府上畜簿會廷尉時有疑奏已再見卻矣掾

史莫知所為寬為言其意掾史因使寬為奏奏成讀之  
皆服以白廷尉湯湯大驚召寬與語乃奇其材以為掾  
上寬所作奏即時得可異日湯見上問曰前奏非俗吏  
所及誰為之者湯言兒寬上曰吾故聞之久矣湯由是  
鄉學以寬為秦讞掾以古法義決疑獄甚重之及湯為  
御史大夫以寬為掾舉侍御史見上語經學上曰吾始  
以尚書為樸學弗好及聞寬說可觀乃從寬問尚書一  
篇上說之擢為中大夫遷左內史寬既治民勸農桑緩

刑罰理獄訟卑體下士務在於得人心擇用仁厚士推情與下不求名聲吏民大信愛之寬表奏開六輔渠定水令以廣溉田收租稅時裁闊狹與民相假貸以故租多不入後有軍發左內史以負租課殿當免民聞當免皆恐失之大家牛車小家擔負輸租緼屬不絕課更以最上由此愈奇寬及議欲放古巡狩封禪之事諸儒對者五十餘人未能有所定先是司馬相如病死有遺書頌功德言符瑞足以封泰山上奇其書以問寬寬對曰

陛下躬發聖德統輯羣元宗祀天地薦禮百神精神所  
嚮徵兆必報天地並應符瑞昭明其封泰山禪梁父帝  
王之盛節也然享薦之儀不著于經以為封禪告成合  
祛於天地神祇祇戒精專以接神明總百官之職各稱  
事宜而為之節文唯聖王所由制定其當非羣臣之所  
能列今將舉大事優游數年使羣臣得人自盡終莫能  
成唯天子建中和之極兼總條貫金聲而玉振之以順  
成天慶垂萬世之基上然之乃自制儀采儒術以文焉

既成將用事拜寬為御史大夫從東封泰山還登明堂  
寬上壽曰臣聞三代改制屬象相因間者聖統廢絕陛  
下發憤合指天地祖立明堂辟雍宗祀泰一六律五聲  
幽贊聖意神樂四合各有方象以承嘉祀為萬世則天  
下幸甚將建太元本瑞登告岱宗發祉闔門以候景至  
癸亥宗祀日宣重光上元甲子肅邕永亨光輝充塞天  
文燦然見象日昭報降符應臣寬奉觴再拜上千萬歲  
壽制曰敬舉君之觴後太史令司馬遷等言歷紀壞廢

漢興未改正朔宜可正上乃詔寬與遷等共定漢太初  
歷初梁相褚大通五經為博士時寬為弟子及御史大  
夫缺徵褚大大自以為得御史大夫至洛陽聞兒寬為  
之乃大笑及至與寬議封禪於上前大不能及退而服  
曰上誠知人寬為御史大夫以稱意任職故久無有所  
匡諫於上官屬易之居位九年以官卒

張湯杜陵人也其父為長安丞出湯為兒守舍還鼠盜  
肉父怒笞湯湯掘熏得鼠及餘肉劾鼠掠治傳爰書訊

鞠論報并取鼠與肉具獄磔堂下父見之視其文辭如  
老獄吏大驚遂使書獄父死後湯為長安吏周陽侯為  
諸卿時嘗繫長安湯傾身事之及出為侯大與湯交徧  
見貴人湯給事內史為甯成掾以湯為無害言大府調  
茂陵尉治方中武安侯為丞相徵湯為史薦補侍御史  
治陳皇后巫蠱獄深竟黨與上以為能遷太中大夫與  
趙禹共定諸律令務在深文拘守職之吏已而禹至少  
府湯為廷尉兩人交驩兄事禹禹志在奉公孤立湯為



人多詐舞智以御人始為小吏乾沒

乾音干乾沒者豫居物以待之得利

為乾失利為沒

與長安富賈田甲魚翁叔之屬交私及列九卿

收接天下名士大夫已心內雖不合然陽浮道與之是

時上方鄉文學湯決大獄欲傳古義乃請博士弟子治

尚書春秋補廷尉史平亭疑法奏讞疑事必奏先為上

分別其原上所是受而著讞法廷尉挈令揚主之明奏

事即譴湯推謝鄉上意所便必引監掾史賢者曰固為

臣議如此上責臣臣弗用愚抵此罪常釋間即奏事上

善之曰臣非知為此奏乃監掾史某所為其欲薦吏揚人之善解人之過如此所治即上意所欲罪予監史深刻者即上意所欲釋予監史輕平者所治即豪必舞文巧詆即下戶羸弱時口言雖文致治上裁察於是往往釋湯所言湯至於太吏內行修交通賓客飲食於故人子弟為吏及貧昆弟調護之尤厚其造請諸公不避寒暑是以湯雖文深意思不專平然得此聲譽而深刻吏多為爪牙用者依於文學之士丞相弘數稱其美及

治淮南衡山江都反獄皆窮根本嚴助伍被上欲釋之  
湯爭曰伍被本造反謀而助親幸出入禁闥腹心之臣  
乃交私諸侯如此弗誅後不可治上可論之其治獄所  
巧排大臣自以為功多此類由是益尊任遷御史大夫  
會渾邪等降漢大興兵伐匈奴山東水旱貧民流徙皆  
仰給縣官縣官空虛湯承上旨請造白金及五銖錢籠  
天下鹽鐵排富商大賈出告緡令鉏豪彊無并之家舞  
文巧詆以輔法湯每朝奏事語國家用日旰天子忘食

丞相取充位天下事皆決於湯百姓不安其生騷動縣官所興未獲其利奸吏並侵漁於是痛繩以罪自公卿已下至於庶人咸指湯湯嘗病上自至舍視其隆貴如此匈奴求和親羣臣議前博士狄山曰和親便上問其便山曰兵凶器未易數動高帝欲伐匈奴大困平城乃遂結和親孝惠高后時天下安樂及文帝欲事匈奴北邊蕭然苦兵孝景時吳楚七國反景帝往來東宮間天下寒心數月吳楚破竟景帝不言兵天下富實今自陛下

下興兵擊匈奴中國以空虛邊大困貧由此觀之不如  
和親上問湯湯曰此愚儒無知狄山曰臣固愚忠若御  
史大夫湯乃詐忠湯之治淮南江都以深文痛詆諸侯  
別疏骨肉使藩臣不安臣固知湯之詐忠於是上作色  
曰吾使生居一郡能無使虜入盜乎山曰不能曰居一  
縣曰不能復曰居一鄣間山自度辯窮且下吏曰能乃  
遣山乘鄣至月餘匈奴斬山頭而去是後羣臣震讟湯  
客田甲雖賈人有賢操始湯為小吏時與錢通及為大

史而甲所以責湯行義有烈士之風湯為御史大夫七

歲敗河東人李文故嘗與湯有隙已而為御史中丞薦

數從中文事

薦數猶簡閱也  
數音色主反

有可以傷湯者不能為地

湯有所愛史魯謁居知湯弗平乃使人上飛變告文姦

事事下湯湯治論殺文而湯心知謁居為之上問變事

從迹安起湯陽驚曰此殆文故人怨之謁居病卧閭里

主人湯自往視病為謁居摩足趙國以冶鑄為業王數

訟鐵官事湯常排趙王趙王求湯陰事謁居嘗案趙王

趙王怨之并上書告湯大臣也史謁居有病湯至為摩足疑與為大姦事下廷尉謁居病死事連其弟弟繫導官湯亦治他囚導官見謁居弟欲陰為之而陽不省謁居弟不知而怨湯使人上書告湯與謁居謀共變告李文事下減宣宣嘗與湯有隙及得此事窮竟其事未奏也會人有盜發孝文園瘞錢丞相青翟朝與湯約俱謝至前湯念獨丞相以四時行園當謝湯無與也不謝丞相謝上使御史案其事湯欲致其文丞相見知丞相患

之三長史皆害湯欲陷之始長史朱買臣素怨湯語在其傳王朝齊人以術至右內史邊通學短長剛暴人也官至濟南相故皆居湯右已而失官守長史詘體於湯湯數行丞相事知此三長史素貴常陵折之故三長史合謀曰始湯約與君謝已而賣君今欲劾君以宗廟事此欲代君耳吾知湯陰事使吏部案湯左田信等曰湯且欲為請奏信輒先知之居物致富與湯分之及他姦事事辭頗聞上問湯曰吾所為賈人輒知益居其物是



類有以吾謀告之者湯不謝又陽驚曰固宜有減宣亦  
奏謁居事上以湯懷詐面欺使使八輩簿責湯湯具自  
道無此不服於是上使趙禹責湯禹至讓湯曰君何不  
知分也君所治夷滅者幾何人矣今人言君皆有狀天  
子重致君獄欲令君自為計何多以對為湯乃為書謝  
曰湯無尺寸之功起刀筆吏陛下幸置位三公無以塞  
責然謀陷湯者三長史也遂自殺湯死家產直不過五  
百金皆所得奉賜無他贏昆弟諸子欲厚葬湯湯母曰

湯為天子大臣被惡言而死何厚葬為載以牛車有棺  
無槨上聞之曰非此毋不生此子乃盡按誅三長史丞  
相青翟自殺出田信上惜湯復稍進其子安世安世字  
子孺少以父任為郎用善書給事尚書精力於職休沐  
未嘗出上行幸河東嘗亡書三篋詔問莫能知惟安世  
識之具作其事後購求得書以相比校無所遺失上奇  
其材擢為尚書令遷光祿大夫昭帝即位大將軍霍光  
秉政以安世篤行光親重之會左將軍上官桀父子及

御史大夫桑弘羊皆與燕王蓋主謀反誅光以朝無舊臣白用安世為右將軍光祿勳以自副焉久之天子下詔曰右將軍光祿勳安世輔政宿衛肅敬不怠十有三年咸以康寧夫親任賢唐虞之道也其封安世為富平侯明年昭帝崩未葬大將軍光白太后徙安世為車騎將軍與共徵立昌邑王王行淫亂光復與安世謀廢王尊立宣帝帝初即位褒賞大臣下詔益封安世萬六百戶功次大將軍光安世子千秋延壽彭祖皆中郎將

侍中大將軍光薨後數月御史大夫魏相上封事言安  
世事孝武皇帝三十餘年忠信謹厚勤勞政事夙夜不  
怠與大將軍定策天下受其福國家重臣也宜尊其位  
以為大將軍毋令領光祿勲事使專精神憂念天下思  
惟得失安世子延壽重厚可以為光祿勲領宿衛臣上  
亦欲用之安世聞指懼不敢當請間求見免冠頓首曰  
老臣耳妄聞言之為先事不言情不達誠自量不足以  
繼大將軍唯天子財哀以全老臣之命上笑曰君言泰

謙君而不可尚誰可者安世深辭弗能得後數日竟拜  
為大司馬車騎將軍領尚書事數月罷車騎將軍屯兵  
更為衛將軍兩宮衛尉城門北軍兵屬焉時霍光子禹  
為右將軍上亦以禹為大司馬罷其右將軍屯兵以虛  
尊加之而實奪其衆後歲餘禹謀反夷宗族安世素小  
心畏忌已內憂矣其女孫敬為霍氏外屬婦當相坐安  
世瘦懼形於顏色上怪而憐之以問左右乃赦敬以慰  
其意安世寢恐職典樞機以謹慎周密自著外內無間

每定大政已決輒移病出聞有詔令乃驚使吏之丞相  
府問焉自朝廷大臣莫知其與議也嘗有所薦其人來  
謝安世大恨以為舉賢達能豈有私謝邪絕弗復為通  
有郎功高不調自言安世曰君之功高明主所知人臣  
執事何長短而自言乎絕不許已而郎果遷莫府長史  
遷辭去之官安世問以過失長史曰將軍為明主股肱  
而士無所進論者以為譏安世曰明主在上賢不肖較  
然臣下自修而已何知士而薦之其欲匿名迹遠權勢

如此為光祿勳郎有醉小便殿上主事白行法安世曰  
何以知其不反水漿邪如何以小過成罪郎淫官婢婢  
兄自言安世曰奴以恚怒誣汙衣冠自署適奴其隱人  
過失皆此類也安世自見父子尊顯懷不自安為子延  
壽求出補吏上以為北地太守歲餘上閔安世年老復  
徵延壽為左曹太僕初安世兄賀幸於衛太子太子敗  
賓客皆誅安世為賀上書得下蠶室後為掖庭令而宣  
帝以皇曾孫收養掖庭賀內傷太子無辜而曾孫孤幼

所以視養拊循恩甚密焉及曾孫壯大賀教書令受詩  
為取許妃以家財聘之曾孫數有徵怪語在宣紀賀聞  
知為安世道之稱其材美安世輒絕止以為少主在上  
不宜稱述曾孫及宣帝立而賀已死上謂安世曰掖庭  
令平生稱我將軍止之是也上追思賀恩欲封其家為  
恩德侯置守冢二百家賀有一子蚤死無子子安世小  
男彭祖彭祖又小與上同席研書指欲封之先賜爵關  
內侯故安世深辭賀封又求損守冢戶數減至三十戶



上曰吾自為掖庭令非為將軍也安世乃止不敢復言  
遂下詔為賀置守冢三十家上自處置其里居冢西鬪  
雞翁舍南上少時所嘗游處也明年復下詔封賀弟子  
侍中關內侯彭祖為陽都侯賜賀諡曰陽都哀侯時賀  
有孤孫霸年七歲拜為散騎中郎將賜爵關內侯食邑  
三百戶安世以父子封侯在位太盛乃辭祿詔都內別  
藏張氏無名錢以百萬數安世尊為公侯食邑萬戶然  
身衣弋綈夫人自紡績家童七百人皆有手技作事內

治產業累積纖微是以能殖其貨富於大將軍光天子甚尊憚大將軍然內親安世心密於光焉元康四年春安世病上疏歸侯乞骸骨不許復彊起視事至秋薨天子贈印綬送以輕車介士諡曰敬侯賜塋杜東將作穿復土起冢祠堂子延壽嗣延壽已歷位九卿既嗣侯國在陳留別邑在魏郡租入歲千餘萬延壽自以身無功德何以能久堪先人大國數上書讓減戶邑又因弟陽都侯彭祖口陳至誠天子以為有讓乃徙封平原并一

國戶口如故而租稅減半薨諡曰愛侯子勃嗣為散騎  
諫大夫元帝初即位詔列侯舉茂材勃舉太官獻丞陳  
湯湯有罪勃坐削戶二百會薨故賜諡曰繆侯後湯立  
功西域世以勃為知人子臨嗣臨亦謙儉每登閣殿常  
歎曰桑霍為我戒豈不厚哉且死分施宗族故舊薄葬  
不起墳臨尚敬武公主公主元帝妹也薨子放嗣鴻嘉中上欲  
遵武帝故事與近臣游宴放以公主子開敏得幸放取  
皇后弟平恩侯許嘉女上為放供張賜甲第充以乘輿

服飾號為天子取婦皇后嫁女大官私官

私官皇后之官也

並

供其第兩宮使者冠蓋不絕賞賜以千萬數放為侍中  
中郎將監平樂屯兵置莫府儀比將軍與上卧起寵愛  
殊絕常從為微行出游北至甘泉南至長楊五祚鬪雞  
走馬長安中積數年是時上諸舅皆害其寵白太后太  
后以上春秋富動作不節甚以過放時數有災異議者  
歸咎放等於是丞相宣御史大夫方進奏放驕蹇縱恣  
奢淫不制前侍御史修等四人奉使至放家逐名捕賊

時放見在奴從者閉門設兵弩射吏距使者不肯內知  
男子李游君欲獻女使樂府音監景武彊求不得使奴  
康等之其家賊傷三人又以縣官事怨樂府游徼莽而  
使大奴駿等四十餘人羣黨盛兵弩白晝入樂府攻射  
官寺縛東長吏子弟斫破器物宮中皆奔走伏匿莽自  
髡鉗衣赭衣及守令史調等皆徒跣叩頭謝放乃止  
奴從者支屬並乘權勢為暴虐至求吏妻不得殺其夫  
或恚一人妄殺其親屬輒亡入放第不得幸得勿治放

行輕薄連犯大惡有感動陰陽之咎為臣不忠首罪名  
雖顯前蒙恩驕逸悖理與背畔無異臣子之惡莫大於  
是不宜宿衛在位臣請免放歸國以銷衆邪之萌厭海  
內之心上不得已左遷放為北地都尉數月復徵入侍  
中太后以放為言出放為天水屬國都尉永始元延間  
比年日蝕故久不還放璽書勞問不絕居歲餘徵放歸  
第視母公主疾數月主有瘳出放為河東都尉上雖愛  
放然上迫太后下用大臣故常涕泣而遣之後復徵放

為侍中光祿大夫秩中二千石歲餘丞相方進復奏放  
上不得已免放賜錢五百萬遣就國數月成帝崩放思  
慕哭泣而死初安世長子千秋與霍光子禹俱為中郎  
將將兵隨度遼將軍范明友擊烏桓還謁大將軍光問  
千秋戰鬪方畧山川形勢千秋口對兵事畫地成圖無  
所忘失光復問禹禹不能記曰皆有文書光由是賢千  
秋以禹為不材歎曰霍氏世衰張氏興矣及禹誅滅而  
安世子孫相繼自宣元已來為侍中中常侍諸曹散騎

列校尉者一十餘人功臣之世惟有金氏張氏親近貴寵比於貴戚放子純嗣侯恭儉自修明習漢家制度故事有敬侯之遺風王莽時不失爵建武中歷位至大司空更封富平之別鄉為武始侯張湯本居杜陵安世武昭宣世輒隨所事帝徙處其陵凡三徙復還杜陵

杜周南陽杜衍人也義縱為南陽太守以周為爪牙薦之張湯為廷尉史使案邊失亡所論殺甚多奏事中意任用與減宣更為中丞者十餘歲周少言重遲而內深



次骨宣為左內史周為廷尉其治大抵放張湯而善候  
司上所欲擠者因而陷之上所欲釋久繫待問而微見  
其寃狀客有謂周曰君為天下決平不循三尺法專以  
人主意指為獄獄者固如是乎周曰三尺安出哉前主  
所是著為律後主所是疏為令當時為是何古之法乎  
至周為廷尉詔獄亦益多矣二千石繫者新故相因不  
減百餘人郡吏大府舉之廷尉一歲至千餘章章大者  
連逮證案數百小者數十人遠者數千里近者數百里

會獄吏因責如章告劾不服以掠笞定之於是聞有逮證皆亡匿獄久者至更數赦十餘歲而相告言大氏盡詆以不道以上廷尉及中都官詔獄逮至六七萬人吏所增加十有餘萬周中廢後為執金吾逐捕桑弘羊衛皇后昆弟子刻深上以為盡力無私遷為御史大夫始周為廷尉史有一馬及久任事列三公而兩子夾河為郡守家訾累巨萬矣治皆酷暴惟少子延年寬厚云延年字幼公亦明法律昭帝初立大將軍霍光秉政以延

年三公子吏材有餘補軍司空始元四年益州蠻夷反  
延年以校尉將南陽士擊益州還為諫大夫左將軍上  
官桀父子與蓋主燕王謀為逆亂假稻田使者燕倉知  
其謀以告大司農楊敞敞惶懼移病以語延年延年以  
聞桀等伏辜延年封為建平侯延年本大將軍霍光吏  
首發大姦有忠節由是擢為太僕右曹給事中光持刑  
罰嚴延年輔之以寬治燕王獄時御史大夫桑弘羊子  
遷亡過父故吏侯史吳後遷捕得伏法會赦侯史吳自

出繫獄廷尉王平與少府徐仁雜治反事皆以為桑遷  
坐父謀反而侯史吳藏之非匿反者乃匿為隨者也即  
以赦令除吳罪後侍御史治實以桑遷通經術知父謀  
反而不諫爭與反者身無異侯史吳故三百石吏首匿  
遷不與庶人匿隨從者等吳不得赦奏請覆治劾廷尉  
少府縱反者少府徐仁即丞相車千秋女壻也故千秋  
數為侯史吳言恐光不聽千秋即召中二千石博士會  
公車門議問吳法議者知大將軍指皆執吳為不道明

日千秋封上衆議光於是以千秋擅召二千石以下外  
內異言遂下廷尉平少府仁獄朝廷皆恐丞相坐之延  
年乃奏記光爭以為吏縱罪人有常法今更抵吳為不  
道恐於法深又丞相素無所守持而為好言於下盡其  
素行也至擅召中二千石甚無狀延年愚以為丞相久  
故及先帝用事非有大故不可棄也間者民頗言獄深  
吏為峻詆今丞相所議又獄事也如是以及丞相恐不  
合衆心羣下謹譁庶人私議流言四布延年竊重將軍

失此名於天下也光以廷尉少府弄法輕重皆論棄市而不以及丞相終與相竟延年論議持平合和朝廷皆此類也延年見國家承武帝奢侈師旅之後數為大將軍光言年歲比不登流民未盡還宜修孝文時政示以儉約寬和順天心說民意年歲宜應光納其言舉賢良議罷酒榷鹽鐵皆自延年發之吏民上書言便宜有異輒下延年平處復奏言可官試者至為縣令或丞相御史除用滿歲以狀聞或抵其罪法常與兩府及廷尉分

章昭帝末寢疾徵天下名醫延年典領方藥帝崩昌邑王即位廢大將軍光車騎將軍張安世與大臣議所立時宣帝養於掖庭號皇曾孫與延年中子佗相愛善延年知曾孫德美勸光安世立焉宣帝即位褒賞大臣延年以定策安宗廟益戶二千三百與始封所食邑凡四千三百戶詔有司論定策功大司馬大將軍光功德過太尉絳侯周勃車騎將軍安世丞相楊敞功比丞相陳平前將軍韓增御史大夫蔡誼功比潁陰侯灌嬰太僕

杜延年功比朱虛侯劉章後將軍趙充國大司農田延年少府史樂成功比典客劉揭皆封侯益王延年為人安和備於諸事久典朝政上任信之出即奉駕入給事中居九卿位十餘年賞賜賂遺訾數十萬光薨後子禹與宗族謀反誅上以延年霍氏舊人欲退之而丞相魏相奏延年素貴用事官職多姦遣吏考案但得苑馬多死官奴婢乏衣食延年坐免官削戶二千後數月復召拜為北地太守延年以故九卿外為邊吏治郡不進上



以璽書讓延年延年乃選用良吏捕擊豪彊郡中清靜  
居歲餘上使謁者賜延年璽書黃金二十斤徙為西河  
太守治甚有名五鳳中徵入為御史大夫延年居父官  
府不敢當舊位坐卧皆易其處是時四夷和海內平延  
年視事三歲以老病乞骸骨天子優之使光祿大夫持  
節賜延年黃金百斤牛酒加致醫藥延年遂稱病篤賜  
安車駟馬罷就第後數月薨諡曰敬侯子緩嗣緩少為  
郎本始中以校尉從蒲類將軍擊匈奴還為諫大夫遷

上谷都尉鴈門太守父延年薨徵視喪事拜為太常治  
諸陵縣每冬月封具獄日常去酒省食官屬稱其有恩  
元帝初即位穀貴民流永光中西羌反緩輒上書入錢  
穀以助用前後數百萬緩六弟五人至大官少弟熊歷  
五郡二千石三州牧刺史有能名惟中弟欽官不至而  
最知名欽字子夏少好經書家富而目偏盲故不好為  
吏茂陵杜鄴與欽同姓字俱以材能稱京師故衣冠謂  
欽為盲杜子夏以相別欽惡以疾見詆乃為小冠高廣

財二寸由是京師更謂欽為小冠杜子夏而鄴為大冠  
杜子夏云時帝舅大將軍王鳳以外戚輔政求賢知自  
助鳳父頃侯禁與欽兄緩相善故鳳深知欽能奏請欽  
為大將軍武庫令職間無事欽所好也欽為人深博有  
謀自上為太子時以好色聞及即位皇太后詔采良家  
女欽因是說大將軍鳳曰禮壹娶九女所以極陽數廣  
嗣重祖也必鄉舉求窈窕不問華色所以助德理內也  
娣姪雖缺不復補所以養壽塞爭也故后妃有貞淑之

行則允嗣有賢聖之君制度有威儀之節則人君有壽考之福廢而不由則女德不厭女德不厭則壽命不究於高年書云或四三年言失欲之生害也男子五十好色未衰婦人四十容貌改前以改前之容侍於未衰之年而不以禮為制則其原不可救而後徠異態後徠異態則正后自疑而支庶有間適之心是以晉獻被納讒之謗申生蒙無罪之辜今聖上富於春秋未有適嗣方鄉術入學未親后妃之議將軍輔政宜因始初之隆建

九女之制詳擇有行義之家求淑女之質母必有聲色技能為萬世大法夫少戒之在色小卞之作可為寒心唯將軍常以為憂鳳白之太后太后以為故事無有欽復重以為言鳳不能自立法度循故事而已會皇太后女弟司馬君力與欽子私通事上聞欽慙懼乞骸骨去後有日蝕地震之變詔舉賢良方正能直言士合陽侯梁放舉欽欽上對曰臣聞日蝕地震陽微陰盛也臣者君之陰也子者父之陰也妻者夫之陰也夷狄者中國

之陰也春秋日蝕三十六地震五或夷狄侵中國或政權在臣下或婦乘夫或臣子背君父事雖不同其類一也臣竊觀人事以考變異則本朝大臣無不自安之人外戚親屬無乖刺之心關東諸侯無彊大之國三垂蠻夷無逆理之節殆為後宮何以言之日以戊申蝕時加未戌未土也土者中宮之部也其夜地震未央宮殿中此必適妾將有爭寵相害而為患者唯陛下深戒之變感以類相應人事失於下變象見於上能應之以德則

異咎消亡不能應之以善則禍敗至高宗遭雖雉之戒  
飭已正事享百年之壽殷道復興要在所以應之應之  
非誠不立非信不行宋景公小國之諸侯耳有不忍移  
禍之誠出人君之言三熒惑為之退舍以陛下聖明內  
推至誠深思天變何應而不感何搖而不動孔子曰仁  
遠乎哉唯陛下正后妾抑女寵防奢泰去佚游躬節儉  
親萬事數御安車由輦道親二宮之饗膳致昏晨之定  
省如此即堯舜不足與比隆咎異何足消滅如不留聽

於庶事不論材而授位殫天下之財以奉淫侈匱萬姓之力以從耳目近諂諛之人而遠公方信讒賊之臣以誅忠良賢俊失在品穴大臣怨於不以雖無變異社稷之憂也天下至大萬事至衆祖業至重誠不可以佚豫為不可以奢泰持也唯陛下忍無益之欲以全衆庶之命臣欽愚戇言不足采其夏上盡召直言之士詣白虎殿對策策曰天地之道何貴王者之法何如六經之義何上人之行何先取人之術何以當世之治何務各以



經對欽對曰臣聞天道貴信地道貴貞不信不貞萬物  
不生生天地之所貴也王者承天地之所生理而成之  
昆蟲草木靡不得其所王者法天地非仁無以廣施非  
義無以正身克己就義恕以及人六經之所上也不孝  
則盡君不忠涖官不敬戰陳無勇朋友不信孔子曰孝  
無終始而患不及者未之有也孝人行之所先也觀本  
行於鄉黨考功能於官職達觀其所舉富觀其所予窮  
觀其所不為乏觀其所不取近觀其所為主遠觀其所

主孔子曰視其所以觀其所由察其所安人焉廋哉取人之術也殷因於夏尚質周因於殷尚文今漢家承周秦之敝宜抑文尚質廢奢長儉表實去偽孔子曰惡紫之奪朱當世治之所務也臣竊有所憂言之則拂心逆指不言則漸日長為禍不細然小臣不敢廢道而求從違忠而耦意臣聞玩色無厭必生好憎之心好憎之心生則愛寵偏於一人愛寵偏於一人則繼嗣之路不廣而嫉妬之心興矣如此則匹婦之說不可勝也唯陛下

純德普施無欲是從如此則衆庶咸說繼嗣日廣而海  
內長安萬事之是非何足備言欽以前事病賜帛罷後  
為議郎復以病免徵詣大將軍莫府國家政謀鳳常與  
欽慮之數稱達名士王駿韋安世王延世等救解馮野  
王王尊胡常之罪過及繼功臣絕世填撫四夷當世善  
政多出於欽者見鳳專政泰重戒之曰昔周公身有至  
聖之德屬有叔父之親而成王有獨見之明無信讒之  
聽然管蔡流言而周公懼穰侯昭王之舅也權重於秦

威震鄰國有旦莫偃伏之愛心不介然有間然范睢起  
徒步由異國無雅信開一朝之說而穰侯就封及近者  
武安侯之見退三事之迹相去各數百歲若合符節甚  
不可不察願將軍由周公之謙懼損穰侯之威放武安  
之欲毋使范睢之徒得間其說頃之復日蝕京兆尹王  
章上封事求見果言鳳專權蔽主之過宜廢勿用以應  
天變於是天子感寤召見章與議欲退鳳鳳甚憂懼欽  
令鳳上疏謝罪乞骸骨文指甚哀太后涕泣為不食上

少而親倚鳳亦不忍廢復起鳳就位鳳心慙稱病篤欲  
遂退欽復說之曰昔周公雖老猶在京師明不離成周  
示不忘王室也仲山甫異姓之臣無親於宣就封于齊  
猶歎息永懷宿夜徘徊不忍遠去况將軍之於主上主  
上之與將軍哉夫欲天下治安息變異之意莫有將軍  
主上昭然知之故攀援不遣書稱公母困我唯將軍不  
為四國流言自疑於成王以固至忠於是鳳復起視事  
上令尚書劾奏京兆尹章章死詔獄章既死衆庶寃之

以譏朝廷欽欲救其過復說鳳曰京兆尹章所坐事密吏民見章素好言事以為不坐官職疑其以日蝕見對有所言也如是則塞爭引之原損寬明之德欽愚以為宜因章事舉直言極諫並見郎從官展盡其意加於往前以明示四方使天下咸知主上聖明不以言罪下也若此則流言消釋疑惑著明鳳白行其策欽之補過將美皆此類也優游不仕以壽終欽子及昆弟支屬至二千石者且十人欽兄緩前免太常以列侯奉朝請成帝

時薨子業嗣業有材能以列侯選復為太常數言得失  
不事權貴與丞相翟方進衛尉定陵侯淳于長不平後  
業坐法免官復為函谷關都尉會定陵侯淳于長有罪  
當就國長舅紅陽侯立與業書曰誠哀老姊垂白隨無  
狀子出關願勿復用前事相侵定陵侯既出關伏罪後  
發下洛陽獄丞相吏搜得紅陽侯書奏業聽請不敬坐  
免就國其春丞相方進薨業上書言方進本與長深結  
厚更相稱薦長陷大惡獨得不坐苟欲郭塞前過不為

陛下廣持平例又無恐懼之心反因時信其邪辟報睚眦怨故事大逆朋友坐免官無歸故郡者今坐長者歸故郡已深一等紅陽侯立坐子受長貨賂故就國耳非大逆也而方進復奏立黨友後將軍朱博鉅鹿太守孫宏故少府陳咸皆免官歸咸故郡刑罰無平在方進之筆端衆庶莫不疑惑皆言孫宏不與紅陽侯相愛宏前為中丞時方進為御史大夫舉掾隆可侍御史宏奏隆前奉使欺謾不宜執法近侍方進以此怨宏又方進為



京兆尹時陳咸為少府在九卿高第陛下所知也方進素與司直師丹相善臨御史大夫缺使丹奏咸為姦利請案驗卒不能有所得而方進果自得御史大夫為丞相即時詆欺奏免咸復因紅陽侯事歸咸故郡衆人皆言國家假方進權太甚案師丹行能無異及光祿勲許商被病殘人皆但以附從方進嘗獲尊官丹前親薦邑子丞相史能使巫下神為國求福幾獲大利幸賴陛下至明遣使者毛莫如先考驗卒得其姦皆坐死假令丹

知而白之此誣罔罪也不知而白之是背經術惑左道也二者皆在大辟重於朱博孫宏陳咸所坐方進終不舉白專作威福阿黨所厚排擠英俊託公報私橫厲無所畏忌欲以熏轡天下天下莫不望風而靡自尚書近臣皆結舌杜口骨肉親屬莫不股栗威權泰盛而不忠信非所以安國家也今聞方進卒病死不以尉示天下反復賞賜厚葬唯陛下深思往事以戒來今會成帝崩哀帝即位業復上書言王氏世權日久朝無骨鯁之臣

宗室諸侯微弱與繫囚無異自佐史以上至於大吏皆  
權臣之黨曲陽侯根前為三公輔政知趙昭儀殺皇子  
不輒白奏反與趙氏比周恣意妄行譖訴故許后被加  
以非罪誅破諸許族敗元帝外家內嫉妬同產兄弟紅  
陽侯立及淳于氏皆老被放棄新喋血京師威權可畏  
高陽侯薛宣有不養母之名安昌侯張禹姦人之雄惑  
亂朝廷使先帝負謗於海內尤不可不慎陛下初即位  
謙讓未遑孤獨特立莫可據仗權臣易世意若探湯宜

蚤以義割恩安百姓心竊見朱博忠信勇猛材畧不世  
出誠國家雄俊之寶臣也宜徵博置左右以填天下此  
人在朝則陛下可高枕而卧矣昔諸呂欲危劉氏賴有  
高祖遺臣周勃陳平尚存不者幾為姦臣笑業又言宜  
為恭王立廟京師以章孝道時高昌侯董宏亦言宜尊  
帝母定陶王丁后為帝太后大司空師丹等劾宏誤朝  
不道坐免為庶人業復上書訟宏前後所言皆合措施  
行朱博果見拔用業由是徵復為太常歲餘左遷上黨

都尉會司隸奏業選舉不實業坐免官復就國哀帝崩  
王莽秉政諸前議立廟尊號者皆免徙合浦業以前罷  
黜故見閭畧憂恐發病死業成帝初尚帝妹潁邑公主  
生無子薨業家上書求還京師與主合葬不許而賜諡  
曰荒侯傳子至孫絕初杜周武帝時徙茂陵至延年徙  
杜陵云

通志卷九十八下